

(2) PREPAUSA D'ACÒRD PLEN: APROBACION, SE PROCEDÍS, DERA PREPAUSA DE RESOLUCION EN MATÈRIA DE LENGUA E DERA CREACION DERA COMISSION DE POLITICA LINGUISTICA. [07/08/2012].

Dat qu'eth Plen deth Conselh Generau d'Aran de data 21 de junh de 2012 aprovèc era creacion d'ua comission politica damb representants de totes es fòrces politiquas presentes en Plen deth Conselh Generau d'Aran qu'auesse per objectiu era definicion e consens des politiquas lingüistiques que s'an d'amiar a tèrme des dera maxima Insitucion aranesa.

Cossent damb çò expausat e dat qu'eth Conselh Generau d'Aran cèrque eth maxim consens politic, institucional e sociau sus era politica lingüistica, e vist eth dictamen positiu dera Comission Informatiua Permanenta de Servicis Generaus de data 3 d'agost de 2012, se prepausa ath Plen:

Prumèr.- Crear era Comission de Politica Linguistica deth Conselh Generau d'Aran, damb representacion de totes es fòrces politiquas presentes en Conselh Generau d'Aran, damb era composicion següenta:

President:       Sindic d'Aran

Vocaus:         Titolar: Mgfc. Sr. Luis Carlos Medina Modroño, en representacion de CDA.

Suplent: Mgfc. Sr. Eduardo Valdecantos Dedieu, en representacion de CDA

Titolar: Mgfc. Sr. Francés X. Boya Alós, en representacion d'UA.

Suplent: Mgfc. Sr. Amador Marqués Atés, en representacion d'UA.

Titolar: Mgfc. Sr. José Antonio Bruna Vilanova, en representacion deth PRAG.

Dusau.- Eth Conselh Generau d'Aran reclame des Institucions Catalanes er usatge e emplec dera variant aranesa dera lengua occitana, qu'at dat pè ath reconeishement dera sua oficialitat en Catalonha, en totes es comunicacions e documents oficials que gesquen des madeishes, en especiau deth Govern e deth Parlament, maximes institucions deth pòble catalan.

Tresau.- Eth Conselh Generau d'Aran laguens dera sua politica lingüistica priorizarà en toti es encastres sociaus er emplec der aranés ena sua forma mèis genuïna e coerenta damb eth territòri d'Aran e era sua istòria.

Quatau.- Eth Conselh Generau d'Aran reconèish ar Institut d'Estudis Aranesi (futura Acadèmia), ena sua seccion de lingüistica, coma era autoritat lingüistica en Aran e Catalonha der occitan, aranés en Aran.

Es membres qu'actuauments compòsen aguesta seccion e que personauments ac accèpten seràn es qu'exercisquen aguesta autoritat lingüistica sus er aranés.

Cincau.- Eth Conselh Generau d'Aran, en tot priorizar er emplec dera varietat aranesa en toti es encastres sociaus, se compromet a velhar qu'era futura Acadèmia age ua

actitut activa en promòir era unitat dera lengua occitana en tot possibilitar era creacion d'un espaci de trebalh e recèrca entà arténher aguesta unitat.

Siesau. - Era futura Acadèmia, Institut d'Estudis Aranesi, se relacionarà e coordinarà liurament damb totes aqueres entitats o institucions qu'agen era volentat de regular era normativa lingüística occitana e qu'agen reconeishement institucionau e sociau damb es quaus i age coincidència des principis e des bases lingüistiques des sòns trebalhs.

Setau. - Eth Conselh Generau d'Aran reclame qu'eth finançament dera Generalitat de Catalunya entà dar compliment ath desplegament dera *Lei 35/2010, d'1 d'octobre, der Occitan, aranés en Aran*, priorize es recorsi entàs iniciatives e prepauses deth Conselh Generau d'Aran entath reconeishement e proteccion dera sua variant der occitan, er aranés, autant en Aran com en Catalonha.

Eth Conselh Generau d'Aran, atau madeish, reclament qu'era rèsta des programes siguen consensuadi entre andús govèrns.